



8. Tschanteda dal cussagl cumünel in marculli, ils 6.5.2015 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi, Jnes Barblan, Liun Quadri

Absaints:

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 8.001 Cas fils electrics sün pasculs düraunt l'inviern, decisiun multa
4. 8.100 Surdeda da las lavuors tagl da god Plaun da la Clüsa
5. 7.900 Lemm Jon Peider, dumanda per metter in zona la parcella nr. 131 in Scheischnas illa zona da misteraunza
6. 7.100 Schlargiamaint da l'infrastructura Foura Chagnöls, furmazion dals parkegis publics in Foura Chagnöls
7. 5.700 Tschërcha d'ün lö per chesa da chüra», decisiun per declaraziun d'intent per stüdi davart la realisaziun
8. 8.100 Proget sanaziun via da god Laret – Alp Griatschouls, surdeda da lavuors d'impressari
9. 8.100 Proget via Varusch, surdeda lavuors vetta da cunsüm
10. 0.130 Strategia da svilup pel lö circol Engiadin'Ota, comune Bregaglia e regione Valposchiavo, convegno cun las vschinaunchas pertuchedas da fer part a l'intent da svilup
11. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 29.04.2015 vain approvo unanimamaing.

60 8.001 Alps e pasculs Cas fils electrics sün pasculs, decisiun multa

Ils 26 schner 2015 es entreda üna denunzcha dal guardgiasulvaschina cunter la societad da pasculs ed alps, causa ch'ün tschierv es resto pendieu vi d'ün fil electric sül pascul in Laret chi nu d'eira gnieu alluntano sur inviern. Impü ho il guardgiasulvaschina denunzcho, ch'in differents lös sül territori cumünel nu sun gnieu alluntanos ils fils da las saivs

electricas. L'orden da pasculs ed alps artichel 16 prescriba, cha tuot ils fils da las saivs sün pasculs cumünels haun da gnir allontanos sur inviern e l'artichel 19 prevezza, cha cuntravenziuns cunter l'orden vegnan multos. Zieva chi s'ho do la pussibiltad da piglier pusiziun als pertuchos s'ho stuvieu constater, cha'l fil tal lö, inua chi s'ho pendieu il tschierv, d'eira prubabel gnieu allontanato e deposito l'asp tal bos-ch. Zieva animeda discussiun decid'il cussagl unanimamaing da na multer il cas cul tschierv, siand chi nu po pü gnir musso sü scha'l fil d'eira allontanato u deposito vi dal bösch. Invaunt decid'il cussagl unanimamaing da multer il surpassamaint chi nu sun gniesu allontanos in differents lösch ils fils electrici cun fr. 500.00 a mauns dals commembers da la suprastanza da la societad da pasculs ed alps chi sun respunsabels per la gestiun. Gian Andrea Bott, scu president da la societad da pasculs ed alps s'ho absanto per quista tractanda.

61 8.100 Forestel

Surdada da las lavuors tagl da god Plaun da la Clüsa

Per fer il tagl da laina tal Plaun da la Clüsa a Chapella s'ho trataint offertas. Resguardand l'import previs i'l preventiv 2015 surdo il cussagl unanimamaing la lavur a la firma Ennio e Piero Ferrari SA da Brusio, per l'import da fr. 33.48 al m³, inclus l'imposta sülla püvalur. La laina vain vendida medemmamaing a la firma Ennio e Piero Ferrari SA pel predschi mediocar da fr.88.00/m³, resguardand la qualiteda la laina. Tar la surdada s'ho resguardo l'offerta la economicamaing la pü favuraivla.

62 7.900 Planisaziun dal territori cumünel

Lemm Jon Peider, dumanda per metter in zona la parcella nr. 131 in Scheischnas illa zona da misteraunza

Il cussagl piglia cugnuschentscha da la charta da Jon Peider Lemm e la dumanda per metter in zona la parcella nr. 131 in Scheischnas illa zona da misteraunza. Il petent fo valair, cha la zona da misteraunza es trat a nüz e cha'l bsögn per simil terrain es aunch'adüna avaint maun. La parcella nr. 270 in vicinanza es gnida miss in zona scu ultima illa zona da misteraunza in connex cun la revaisa totela da la planisaziun locala, chi'd es gnida approveda l'an passo tres la Regenza. Il cussagl decida unanimamaing, da tscherner a la prosma radunanza üna cumischiun da planisaziun chi prepara la revisiun parciela da la planisaziun locala, per invier l'inzonaziun.

63 7.100 Chanalisaziun/sarinera

Schlargiamaint da l'infrastructura Foura Chagnöls, furmaziun dals parkegis publics in Foura Chagnöls

In connex cun las lavuors finelas da salascheda chi sun previsa quista sted in Foura Chagnöls es da furmer nouv il parkegis publics. Il cussagl piglia cugnuschentscha da la proposta preparada da l'indschegner e decida unanimamaing da spuster la via vers il avaint porta da la chesa sün parcella nr. 49, per cha'ls parkegis haun l'imsüra da standard.

64 5.700 Asil per vegls

Tschercha d'ün lö per chesa da chüra, decisiun per declaraziun d'intent per stüdi davart la realisibiltad

In consequenza da la decisiun negativa regard il proget Farkas haun las vschinaunchas da Segl, Silvaplauna, San Murezzan e Puntraschigna decis d'eriger üna chesa da chüra a San Murezzan per zuglier il bsögn da lets da chüra previs per las 4 vschinaunchas. Per tuot las otras vschinaunchas in Engiadina'Ota es previs üna nouva chesa da chüra in Promulins. Quella chesa da chüra dess spordscher 48 lets cun üna chüra plaina

specialiseda inclus üna partiziun per personas dementas in üna chesa in vicinanza da l'edifizii existent. Ad es da fer quint cun cuosts d'investiziun da 16.8 miliuns francs fin 24 miliuns francs. In quist connex decid'il cussagl unanimamaing da sustgnair l'elavuraziun d'ün stüdi realisabel suot la bachetta da la cumischiun da l'ospidel e da la chesa d'attempo e chüra.

65 8.100 Forestel
Proget sanaziun via da god Laret – Alp Griatschouls, surdeda da lavuors d'impressari

Il cussagl piglia cugnuschentscha da las offertas chi sun entredas in connex cun l'intent da refer la via da l'acla Laret fin Griatschouls. L'uffizi chantunel da god e prievels da la natüra ho valüto las offertas tenor ledscha da submissiun chantunela ed ho do ün'arcumandaziun per surder la lavur. Resguardand la valütaziun da l'uffizi chantunel decid'il cussagl unanimamaing da surder la lavur d'impressari a la firma Flura Agrar GmbH da Müstair per l'import da fr. 35'499.80, inclus l'imposta sülla püvalur. Tar la surdeda s'ho resguardo l'offerta economicamaing la pü favuraivla.

66 8.100 Forestel
Proget via Varusch, surdeda lavuors vetta da consüm

Per eriger la vetta da consüm tal traquet Prasüras fin Muglins s'ho scrit our la lavur. Il cussagl piglia cugnuschentscha da las offertas chi sun entredas. Eir co ho l'uffizi chantunel da god e prievels da la natüra valüto las offertas tenor ledscha da submissiun chantunela ed ho do ün'arcumandaziun per surder la lavur. Resguardand la valütaziun da l'uffizi chantunel decid'il cussagl unanimamaing da surder la lavur a la firma Walo Bertschinger AG da Samedan per l'import da fr. 12'150.00, inclus l'imposta sülla püvalur. Tar la surdeda s'ho resguardo l'offerta economicamaing la pü favuraivla.

67 0.130 Regiun
Strategia da svilup pel lö circol Engiadin'Ota, comune Bregaglia e regione Valposchiavo 2030, convegno cun las vschinaunchas pertuchedas da fer part a l'intent da svilup

Il 13 avrigl 2015 ho gieu lö a Puntraschigna üna preschantaziun pels cusgliers cumünels regard la strategia da svilup per nossa regiun. Düraunt püs inscunters haun ils rapreschantants da la politica e da l'economia da las vschinaunchas in Engiadin'Ota e vals dal süd, cun sustegn da l'uffizi chantunel per l'economia e'l turissem scu eir il secretariat dal stedi per l'economia (SECO) fat impissamaints sur da la direcziun da la strategia, dals lös scu eir da las sfidas chi vegnan cul temp ed in che direcziun cha l'Engiadin'Ota scu eir las vals Puschlev e Bregaglia dess ir. La globalisaziun maina ad üna concorrenza intensiva traunter las regions in Grischun. Ün'imaginaziun clera da la strategia dal svilup dal lö es in quista chosa da grand'importanza. Per la regiun turistica d'Engiadin'Ota exista üna sfida, siand cha'l numer da pernottaziuns dals ultims 20 ans vo inavous e la capacited da fer investiziuns da las gestiuns d'albiereg e da las pendiculeras es insufficiainta. Il cussagl piglia cugnuschentscha da la proposta dal palperi strategic chi vain suottascrit da tuot las vschinaunchas pertuchedas e fo üna lecziun da quel. Zieva cuorta discussiun decid'il cussagl unanimamaing d'accepter e da suottascriver il palperi strategic cun las definiziuns dals böts, las prioriteds e las imsüras pel svilup dal lö in Engiadin'Ota, i'l Puschlev ed in Bregaglia.

Il cussagl piglia cugnuschentscha dal documaint da la lavur GEP chi'd es gnieu eret in incumbenza da l'associaziun Ara Suot Funtauna Merla. Differents puncts nu's cunfaun cul stedi actuel a S-chanf.

Il president orientescha, ch'in Plaun Grand s'ho stuvieu constater, cha püssas persunas depositeschan immundizchas d'üert, grascha da chavals e dafatta vanzets da bacharia tal Plaun Grand in Cinuos-chel. Adonta chi's metta a disposiziun ün lö per immundizchas d'üert in Bos-chetta Plauna chi'd es accessibel adüna ed adonta cha la ledscha davart las immundizchas proibischa cleramaing, vain bütto da tuot sün terrain cumünel. Simils surpassamaints da la ledscha d'immundizchas paun gnir multos fin fr. 10'000.00. In ün prüm pass dess gnir munteda üna tevla chi muossa vi süls surpassamaints e d'eruir ils culpabels.

A las 22.00 vain la tschanteda alveda.

In buna fè

L'actuar:

D. Schwenninger